

**«Կապանի ճանապարհների շահագործման և շինարարական» ՍՊԸ կողմից
ներկայացված ՀՀ Սյունիքի մարզի Խալաջի բազալտի հանքավայրից օգտակար
հանածոյի արդյունահանման աշխատանքների շրջակա միջավայրի վրա ազդեցության
նախնական գնահատման հայտի վերաբերյալ 2-րդ հանրային քննարկման**

Ա Ր Ձ Ա Ն Ա Գ Ր ՈՒ Թ Յ ՈՒ Ն

14.02.2022թ.

ք.Կապան

«Շրջակա միջավայրի վրա ազդեցության գնահատման և փորձաքննության մասին» ՀՀ օրենքի /21.06.2014թ. ՀՕ-110-Ն/, ինչպես նաև ՀՀ կառավարության 19.11.2014թ. N 1325-Ն որոշմամբ սահմանված կարգով՝ որպես ազդակիր համայնք Աճանանի գյուղապետարանի վարչական շենքում 2022 թվականի փետրվարի 8-ին, ժամը 15:00-ին տեղի ունեցավ «Կապանի ճանապարհների շահագործման և շինարարական» ՍՊԸ կողմից ներկայացված ՀՀ Սյունիքի մարզի Խալաջի բազալտի հանքավայրից օգտակար հանածոյի արդյունահանման աշխատանքների շրջակա միջավայրի վրա ազդեցության նախնական գնահատման հայտի վերաբերյալ 2-րդ հանրային քննարկումը:

Քննարկմանը ներկա էին ՀՀ շրջակա միջավայրի նախարարության «Շրջակա միջավայրի վրա ազդեցության գնահատման փորձաքննական կենտրոն» ՊՈԱԿ-ի, «Կապանի ՃՇՇ» ՍՊ ընկերության, Կապանի համայնքապետարանի ներկայացուցիչներ, ինչպես նաև այլ քաղաքացիներ:

Հանրային քննարկման մասնակիցների անհատական կազմը կցվում է սույն արձանագրությանը:

Հանրային քննարկումը վարեց Կապան համայնքի ղեկավարի տեղակալ՝ Գոռ Թադևոսյանը: Նա ողջունեց ներկաներին, ներկայացրեց օրակարգը: Որպես ծանոթություն հիշեցրեց, որ հանրային քննարկման վերաբերյալ կարելի էր ծանոթանալ «Հայաստանի Հանրապետություն» օրաթերթի 2022 թվականի հունվարի 19-ի թիվ 8 համարում, ինչպես նաև ՀՀ շրջակա միջավայրի նախարարության և Կապանի համայնքապետարանի պաշտոնական կայքէջերի հայտարարությունների բաժնում (www.env.am, www.kapan.am):

Զեկույցի համար խոսքը փոխանցվեց ՀՀ շրջակա միջավայրի նախարարության «Շրջակա միջավայրի վրա ազդեցության գնահատման փորձաքննական կենտրոն» ՊՈԱԿ-ի գլխավոր մասնագետ՝ Հովիկ Մեսրոպյանին:

Զեկույց (Հովիկ Մեսրոպյան)- Հարգելի հանրային քննարկման մասնակիցներ, օրենքով սահմանված կարգով մենք ծանուցել ենք Կապանի համայնքապետարանին, որն էլ իր հերթին տեղեկացրել է Աճանան բնակավայրին քննարկման վերաբերյալ: ՀՀ շրջակա միջավայրի նախարարության «Շրջակա միջավայրի վրա ազդեցության գնահատման փորձաքննական կենտրոն» ՊՈԱԿ-ին է ներկայացվել ՀՀ Սյունիքի մարզի Խալաջի բազալտի հանքավայրից օգտակար հանածոյի արդյունահանման աշխատանքների շրջակա միջավայրի վրա ազդեցության նախնական գնահատման հայտը: Համայնքը տվել է իր համաձայնությունը տվյալ տարածքում օգտակար հանածոյի արդյունահանման աշխատանքներ իրականացնելու համար: Քանի որ գործունեությունը դասակարգվում է որպես «Ա» կատեգորիայի, ապա

քննարկումները իրականացվելու են երկու փուլով՝ նախնական և հիմնական: Այս պահին մենք նախնական փուլում ենք, իսկ մինչ այս եղել է 1-ին հանրային քննարկումը, համայնքը տվել է համաձայնությունը, արձանագրությունը, մասնակիցների ցանկը և տեսաձայնագրությունը փորձաքննություն իրականացնելու նպատակով: Այսօրվա՝ 2-րդ հանրային քննարկումից հետո կտրվի ձեռնարկողին տեխնիկական առաջադրանք, որի հիման վրա կկազմվի շմագ հաշվետվությունը: Կիրականացվի ևս երկու հանրային քննարկում (3-րդ, 4-րդ), որից հետո օրենքի տարրին համապատասխան կտրվի պետական փորձաքննական եզրակացություն: Հայտի վերաբերյալ նշեմ, որ փորձաքննական գործընթացին մասնակցել են ՀՀ շրջակա միջավայրի նախարարության բոլոր ստորաբաժանումները՝ անտառային, վտանգավոր նյութերի և թափոնների, ջրային ռեսուրսների քաղաքական վարչությունները, հիդրոերևույթաբանական կայանը և այլն: Բացի ՀՀ շրջակա միջավայրի նախարարության ստորաբաժանումներից փորձաքննությանը մասնակցել են նաև արտակարգ իրավիճակների, առողջապահության, կրթության, գիտության, մշակույթի և սպորտի նախարարությունները, ինչպես նաև կադաստրի կոմիտեն և Սյունիքի մարզպետարանը: Բոլոր կարծիքները, դիտողությունները և առաջարկությունները հաշվի են առնվել և հայտը ուղարկվել է ձեռնարկողին երկու անգամ լրամշակման: Բնապահպանական մասով նշեմ, որ հանքի ծառայման ժամկետը 20 տարի է, ամենամեծ երկարությունը՝ 200 մ, լայնությունը՝ 85 մ, առավելագույն խորությունը՝ 50 մ, իսկ տարեկան արտադրողականությունը՝ 15000 մ³ : Հայտում ներառված են բնապահպանական ազդեցությունների նվազեցմանն ուղղված այն միջոցառումները, որոնց կիրառման ընթացքում գրեթե զրոյանալու են շրջակա միջավայրի վրա հասցվելիք վնասները: Օրինակ՝ վառելիքը պետք է լիցքավորվի ոչ թե տարածքում, այլ հատուկ կետերում, որպեսզի չթափվի ու հողի աղտոտվածություն տեղի չունենա: Այլ օրինակներ՝ մեքենաների կայանման համար նախատեսված տարածքի բետոնապատում, հնամաշ մասերի, դետալների հավաքում հատկացված առանձին տեղերում և հանձնում որպես մետաղական ջարդոն, հնամաշ անվադողերի տեղափոխում սահմանապահ զորամասեր, արտադրվող թունավոր նյութերի դեմ ֆիլտրերի տեղադրում: Հայտում ներկայացվել է, որ տարվա չոր և շոգ եղանակին օգտագործվելու են ջրցան մեքենաներ, որպեսզի փոշի չառաջանա: Կեղտաջրերը կհավաքվեն հորատից զուգարանում, որը հետագայում դատարկվելու է պայմանագրային հիմունքներով՝ լիցենզավորում ունեցող ծառայությունների կողմից: Հետագայում կիրականացվի արտադրական հրապարակի բարեկարգում, կանաչապատում և այլն: Եթե լինի թույլտվություն և աշխատանքները սկսվեն, ապա հայտում ներկայացված այդ հողաբուսաշերտը կլցվի առանձին հատուկ հատկացված վայր, կմնա այնտեղ մինչև հանքարդյունաբերական աշխատանքների ավարտը և կիրականացվի ռեկուլտիվացիա: Յուրաքանչյուր հանքարդյունահանման ավարտից հետո ընկերությունը պարտավոր է տարածքը վերականգնելու՝ բերելու իր նախկին տեսքին: Նախկինում եթե ընկերությունները աշխատանքների ավարտից հետո ռեկուլտիվացիա չէին իրականացնում, ապա այժմ այն պարտադիր է, նոր օրենքի պահանջ է: Աշխատանքերի առաջին իսկ օրվանից սկսած ընկերությունը բյուջե է փոխանցում ռեկուլտիվացիայի համար անհրաժեշտ գումարը, որպեսզի 20 տարին լրանալու պես ռեկուլտիվացիայի համար պահանջվող գումարը արդեն իսկ բյուջեով նախատեսված լինի:

Ձեկույցի համար խոսքը փոխանցվեց «Կապանի ՃՇՇ» ՍՊԸ գլխավոր ճարատարագետ՝ Սերգեյ Առստամյանին:

Ձեկույց (Սերգեյ Առստամյան)- Հարգելի հանրային լսման մասնակիցներ, մեր ընկերությունը պատրաստ է այդ աշխատանքները իրականացնել այնպես, ինչպես պահանջում է օրենքը: Այդ աշխատանքերը իրականացվելու են հորատասեպային ձևով, այսինքն պայթեցման աշխատանքներ չեն լինելու: Էքսկավատոր, բուլդոզեր, նման մեխանիզմներ են աշխատելու և աշխատանքները կկատարվեն 5 մ լայնությունով, 2,5 մ բարձրությունով, որպեսզի փլուզումներ չառաջանան: Ինչպես նշվեց, պետք է ջրվի, կանաչ գոտի ստեղծվի: Հնարավոր է, որ մեխանիզմի աշխատանքներից աղմուկ լինի, ընկերությունը կձեռնարկի այդ աղմուկի դեմ փակել ձայնախլացուցիչ շերտերով: Աշխատանքը լինելու է մեկ հերթափոխով՝ 8 ժամյա, իսկ հանքի ծառայման ժամկետը՝ 20 տարի:

Հարց (Սոնա Հովհաննիսյան-Աճանանի միջնակարգ դպրոցի տնօրեն)- Քանի որ դպրոցը համարվում է հենց առաջին ազդակիր օբյեկտը, ես մտահոգված եմ դրանով, որովհետև այնտեղ դասապրոցես է իրականանում: Դուք խոսեցիք փոշու մասին, խոսեցիք ձայնի մասին, այդքանի հետ գումարած նաև դպրոցի ամրության հարցը, քանզի այն անմիջապես դպրոցի ներքևում է: Ինչպես է դա լինելու, ինչպես է ապահովվելու դպրոցի անվտանգությունը, արդյո՞ք մեկ օր մենք նույնպես չենք հայտնվի ներքևի ճանապարհին: Ինձ շատ մտահոգում է դասապրոցեսի վրա ազդող աղմուկը և փոշին:

Պատասխան (Սերգեյ Առստամյան)- Ընկերությունը չի որոշում, թե դեցիբելը ինչքան լինի, փոշին ինչքան լինի: Դրա համար կան համապատասխան ծառայություններ, նրանք դա կուսումնասիրեն: Սա դեռ երկրորդ հանրային լսումն է ու դեռ շարունակական ևս երկու լսում կլինի: Ձեր հարցերը գրանցվում են և կստանան պատասխաններ:

Հարց (Սոնա Հովհաննիսյան)- Մինչ աշխատանքները սկսելն եք ապահովելու այս ամեն մի մտահոգող հարցի պատասխանը, թե՞ աշխատանքները սկսելու ընթացքում է որոշվելու՝ ի՞նչն է վնաս:

Պատասխան (Սերգեյ Առստամյան)- Ամեն ինչ հաշվի կառնվի, դեռ լսումներ կունենանք և Ձեր հարցերին համապատասխան լուծումներ կտրվեն:

Լրացում (Գոռ Թադևոսյան)- Դեռևս առաջին լսման ժամանակ այս հարցերը հնչեցվել են, մենք նույնպես բարձրաձայնել ենք կապված աղմուկի, փոշու, բնակելի և ոչ բնակելի հասարակական շենքերի անտանգության հետ: Այդ ժամանակ կար հարց նույնիսկ, թե գիշերային ժամերին աշխատելու են, թե ոչ: Ընկերությունը պատասխանեց, որ չի աշխատելու: Փոշու հետ կապված էլ հայտում ներկայացված են միջոցառումներ, որպեսզի փոշի չառաջանա: Երրորդ մտահոգիչ հարցը շենքերին հասցվող հնարավոր վնասի մասին է, ինչին ի պատասխան ընկերությունը ասեց, որ պայթեցումներ չեն լինելու, տեխնիկայով է քարը կտրվելու: Որպես համայնքի ներկայացուցիչ ևս մեկ դիտողություն եմ ուզում նշել հանքի հետ կապված՝ ցանկացած օգտակար հանածոյի արդյունահանման աշխատանքների շրջակա միջավայրի վրա ազդեցության նախնական գնահատման հայտ բնականաբար համապատասխան նորմատիվ իրավական ակտերի և ՀՀ ընդերքի մասին օրենսգրքի հիման վրա է կազմվում: Համաձայն ՀՀ ընդերքի մասին օրենսգրքի 54-րդ հոդվածի, որը սահմանում

է օգտակար հանածոյի պայմանագրերի կնքումը և ընդերքօգտագործման պայմանագրերի օրինակելի ձևերը հաստատելու մասին ՀՀ 2012թ" մարտի 22-ի 437-Ն որոշման օգտակար հանածոյի արդյունահանման պայմանագիրը պետք է նախատեսի դրույթներ՝ համայնքի սոցիալ-տնտեսական զարգացման ոլորտում ստանձնած պարտավորությունների չափի և կատարման ժամկետների վերաբերյալ: Հայտում չտեսանք համայնքի հանդեպ ստանձնած սոցիալ-տնտեսական պարտավորությունների վերաբերյալ կետ: Խնդրում եմ հաջորդ անգամ սա ներառել: Մենք առաջարկում ենք ֆիքսել և ապագայում օգտակար հանածոյի արդյունահանման պայմանագրի կնքման ժամանակ՝ որպես համայնքի հանդեպ ստանձնած սոցիալ-տնտեսական պարտավորություն սահմանել տարեկան 20 միլիոն դրամ: Սա համայնքի առաջարկությունն է, որ համայնքն էլ կարողանա համապատասխան ծրագրեր իրականացնել նշված տարածաշրջանում: Սա համայնքապետարանի մոտեցումն է այս հարցի հետ կապված:

Հարց (Հովիկ Մեսրոպյան)- Առաջին լսման ժամանակ համայնքի հետ որևէ սոցիալական պայմանավորվածություն չի՞ եղել:

Պատասխան (Գոռ Թադևոսյան)- Ոչ:

Լրացում (Հովիկ Մեսրոպյան)- Եթե չնախատեսվի, մենք հայտը ներկայացնում ենք լրամշակման հիմնական փուլում: Արդեն երրորդ հանրային քննարկման հիման վրա կտրվի տեխնիկական առաջադրանք, որի հիման վրա կկազմվի շմագ հաշվետվություն: Երրորդ հանրային քննարկումը իրականացնելու ընթացքում դուք կներկայացնենք համայնքին սոցիալական օգնություն ցուցաբերելու ծրագիրը՝ որոշելով համայնքապետարանի և վարչական ղեկավարի հետ միասին:

Հարց (Սոնա Հովհաննիսյան)- Արդյո՞ք դպրոցն էլ նկատի ունեք:

Պատասխան (Գոռ Թադևոսյան)- Ինչը, որ համայնքի լիազորությունների շրջանակներում է, աշակերտները այս տարածքում են ապրում, բնականաբար դա իրենց էլ է վերաբերվում: Խոսքը սոցիալ-տնտեսական պարտավորությունների մասին է և դա ամենևին չի նշանակում, որ Ձեր մյուս մտահոգող հարցերին չենք անդրադառնալու: Այսուհետ կառավարության համապատասխան որոշումով՝ ընդերքօգտագործողը պետք է նշի իր սոցիալական ծրագրի չափը և ժամկետները: Մենք առաջարկում ենք, որ արդեն երրորդ հանրային քննարկման ժամանակ ընկերությունը իմանա համայնքի կարծիքը այս հարցի վերաբերյալ:

Լրացում (Հովիկ Մեսրոպյան)- Հատկապես վերջին երկու տարիների ընթացքում փորձաքննական կենտրոնից ինչ եզրակացություն, որ դուրս է գալիս՝ պարտադիր պահանջի կետեր կան, որ մենք դնում ենք: Այդ կետերից մեկը վերաբերվում է համայնքի սոցիալ-տնտեսական օգնությանը: Մենք պարտադիր նշելու ենք և պահանջ ենք ներկայացնելու ընկերությանը, որպեսզի համայնքին ցուցաբերվի սոցիալական օգնություն՝ անկախ նրանից, թե հայտում գրված կլինի, թե չի լինի:

Հարց (Թադևոս Նավասարդյան- Աճանանի բնակիչ)- Տարիներ առաջ, երբ ավագանի էի, Ձեր ընկերությունը այստեղ խմելու ջուր էր անցկացնում և նմանատիպ ժողով արվել էր նաև այն ժամանակ ու հարցը մնաց փակուղում: Մարդիկ այստեղ տարբեր տեղերից եկել են և այս գյուղում գտել իրենց վերջին ապաստանը: Ուրիշ տեղ չկար հանք բացելու: Ձեր կողմից հատկացվելիք գումարով ավելի լավ է բնակարաններ գնեք, բնակչությանը վտարեք

այստեղից, հետո ուզում եք հանք բացեք, ուզում եք մարզադաշտ: Մի կողմից կորոնավիրուսը, մի կողմից պատերազմը, մյուս կողմից Քաջարանի և Կապանի կոմբինատները: Իմ անունից ասում եմ կամ տալու եք փոխհատուցում և ես իմ բնակարանից կգնամ, կարտագաղթվեմ Հայաստանից կամ էլ հերիք է, այդ հանքը չի բացվելու, վերջ:

Լրացում (Գոռ Թադևոսյան)- Եթե բազալտի հանքի հետ կապված մտահոգող հարցեր կան, ապա խնդրում եմ դրանք կոնկրետ թեմայի շրջանակներում:

Հարց (Կարեն Բաբայան- Աճանանի բնակիչ)- Հենց դպրոցի ներքևի հատվածում պիտի հանքը բացվի: Ավելի խոշոր տարբերակով, որ բարձրանում ես գյուղը այդ դիրքի հատվածում է, մյուսը՝ ձորի հատվածում:

Պատասխան (Սերգեյ Առստամյան)- Պատճառը այն է, որ այդ տարածքն է գրանցված ընդերքում:

Հարց (Հրաչ Կարապետյան- Աճանանի բնակիչ) Խալաջում ապրում է 70 տնտեսություն: Փաստորեն դուք հաշվի չեք առնում այդ 70 ընտանիքի կարծիքը: Եթե յուրաքանչյուրիդ տնից 30-60 մ հեռավորության վրա բուլդոզեր աշխատացնեն, դուք կհամաձայնվե՞ք: Ես 2008 թվականից այստեղ եմ ապրում, սկզբից բերք էի վերցնում, իսկ վերջին երեք տարում բերք չեմ տեսել, մեղր չեմ վերցրել: Ինչո՞ւ եք հանքը հենց այստեղ բացում: Մենք համաձայն չեք, թողեք հանգիստ ապրենք:

Հարց (Լիդա Դադայան- Աճանանի բնակիչ)- 34 տարի է այստեղ եմ ապրում: 1988 թվականից այստեղ ով եկել, մեզ վատություն է արել: Պոչամբարի օդը մենք ենք շնչում: Ամռան ամենասիրուն պահին իմ այգին չորանում է: Դուք քար եք հանում ու այդ փոշին մի՞թե մեզ չի հասնելու: Մենք գալիս ենք Ձեր տան տակը քանդո՞ւմ: Ուրիշ տեղ չկա՞ր հանք բացելու: Հանքը առանց պայթեցումների գործ են կատարում, ի՞նչ է:

Լրացում (Հովիկ Մեսրոպյան)- Հանքը առանց պայթեցման աշխատանքների է իրականացվելու: Պայթեցում չկա: Եթե պայթեցում լիներ, մենք ՊՆ նախարարություն պիտի ուղարկեինք կարծիք, ստանայինք պատասխաններ, թե ինչ նյութեր է օգտագործվելու, պիտի պահպանվեր 200-300 մ սանիտարապաշտպանիչ գոտին: Բայց այս պարագայում հանքը առանց պայթեցումների է աշխատելու: Իսկ, թե ինչու է այս տարածքում բացվում, որովհետև պաշարները հաստատվել են այստեղ և այստեղ են իրականացվել երկրաբանական ուսումնասիրություններ: Այս տարածքն է գրանցված ընդերքում, որ պաշար ունի: Միգուցե այլ տեղ ավելի մեծ պաշար կա, բայց այն ուսումնասիրված չէ և պաշարը հաստատված չէ:

Լրացում (Գոռ Թադևոսյան)- Համայնքը չի որոշում: Հանրային լսումները իրականացվում են, որպեսզի լսենք հանրության կարծիքը: Այս քննարկումները հենց նրա համար են, որ բարձրացվեն բոլոր խնդիրները և պահանջները ընկերությանը, որպեսզի խնդիրները լուծի կամ նվազագույնի հասցնի: Եվ ինչ եղանակով էլ, որ որոշվի հանքը շահագործվի, որպես համայնքի ներկայացուցիչ երաշխավորում եմ, որ մենք հետևողական ենք լինելու, որ պահպանվեն բոլոր բնապահպանական նորմերը և այն պահանջները, որ դրված են լինելու ընկերության առջև: Առաջին պահանջատերը մենք ենք լինելու՝ համայնքը:

Հարց (Գառնիկ Սահակյան- Աճանանի բնակիչ)- Ինչպես այն ժամանակ ջրի հարցը մնաց, նույնն էլ սա է, անհնար է առանց պայթեցման: Վերջին երկրաշարժի ժամանակ տները լրիվ ճաքեր են տվել:

Լրացում (Հրաչ Կարապետյան- Աճանանի բնակիչ)- Մեզ սոցիալական օգնություն պետք չի, մեզ պետք է, որ հանքը չլինի:

Հարց (Ալեն Բաղդասարյան- Աճանանի բնակիչ)- Տեխնիկա աշխատելու է չէ՞, այդ դեպքում դիզվառելիքից թունավոր ծուխ է արտանետվելու: Ես ինքս հանքի աշխատող եմ, աշխատանքից հետո պետք է գամ ու նորից ծուխ շնչեմ՝ մաքուր օդի փոխարեն:

Լրացում (Թադևոս Նավասարդյան- Աճանանի բնակիչ)- Մեզ ոչինչ պետք չէ, հանք բացելու նպատակով թող ոչ մի կազմակերպություն Աճանան համայնք չգա: Ընդերքը ժողովրդինն է, ոչ ոք չի կարող ստիպել:

Ամփոփում (Գոռ Թադևոսյան)- Հարգելի մասնակիցներ, բոլորի առաջարկները և կարծիքները հաշվի կառնվեն և կարձանագրվեն: Շնորհակալություն եմ հայտնում բոլորին մասնակցության համար:

Հանրային քննարկման պատասխանատու՝

Կապան համայնքի ղեկավարի առաջին տեղակալ

Գոռ Թադևոսյան

Ձեռնարկող՝

«Կապանի ՃՇՇ» ՍՊԸ տնօրեն

Արարատ Կարապետյան

Հանրային քննարկման վարող՝

Կապան համայնքի ղեկավարի առաջին տեղակալ

Գոռ Թադևոսյան

Հանրային քննարկման արձանագրող՝

Կապանի համայնքապետարանի

գյուղ. և հողօգտ. բաժնի առաջատար մասնագետ

Արմինե Սահակյան